

Morning Dogri (NSD) Bulletin 29-08-2025

आकाशवाणी

खबरां विजय बजाज कोला:-

- प्रधानमंत्री नरेन्द्र मोदी होर 15में भारत-जापान सलाना शिखर सम्मेलन च हिस्सा लैने लेई जपान दे अपने दउं दिनें दे दौरे तैहत टोक्यो पुज्जी गे ना।
- भारत नै दिनेश के. पटनाईक होरें गी कनाडा च अपने नमें हाई कमिशनर दे तौर पर नियुक्त कीता ऐ।
- यूरोपीय संघ नै यूक्रेन दी राजधानी कीव पर रूस दे मारू हमले पर रोह-रोसा जताया ऐ। इस हमले च यूरोपी संघ दा दफ्तर तबाह होई गेआ ऐ ते 23 लोक मारे गे ना।
- हॉकी दे सब्भनें शा म्हान खड्डारिएं चा इक्क मेजर ध्यान चंद हुंदी जयंती पर अज्ज राष्ट्री खेड्डु दिवस मनाया जारदा ऐ।
- मर्दे दी 12में एशिया कप हॉकी प्रतियोगिता अज्ज राष्ट्री खेड्डु दिवस दे मौके उप्पर राजगीर च शुरु होआ रदी ऐ।
- अहमदाबाद च जारी भार तुल्लकने आहली राष्ट्रमंडल चैंपियनशिप च भारत दे भार तुल्लकने आहले खड्डारिएं दा शानदार प्रदर्शन जारी ऐ। मर्दे दे 79 किलोग्राम भार वर्ग च अजय बाबू वल्लूरी होरें 335 किलोग्राम भार चुक्कियै सुन्ने दा तगमा जित्तेआ।

<><><><><><>

PM -Japan

प्रधानमंत्री नरेन्द्र मोदी अज्ज टोक्यो च 15में भारत-जापान वार्षिक शिखर सम्मेलन च हिस्सा लैंगन। श्री मोदी जापान दी दंऊ दिनें दी अधिकारिक यात्रा पर अज्ज बड्डुलै टोक्यो पुज्जे। एह यात्रा जापान दे प्रधानमंत्री शिगेरु इशिबा हुंदे साद्दे पर होआ रदी ऐ। शिखर

सम्मेलन दे दौरान दवै नेता सभनें खेतरें च दपक्खी सरबंधें दी समीक्षा करगंन। विशेष रणनीतिक ते वैश्विक सांझेदारी दे अगले चरण गी अगगै बदाने दे उपायें पर बी चर्चा होग- जेहड़ी पिच्छले 11 बरें च लगातार विकसित होई ऐ। जापान आस्तै खाना होने शा पैहले इक ब्यान च श्री मोदी होरें विश्वास व्यक्त कीता जे जापान ते चीन दी यात्रा- भारत दे राष्ट्री हितें ते प्राथमिकताएं गी अगगै बदांगन ते क्षेत्रीय ते वैश्विक शांति-सुरक्षा ते सतत विकास गी अगगै बदाने च सार्थक सहयोग च बी योगदान देग। उनें आक्खेया जे जापानी प्रधानमंत्री शिगेरु इशिबा हुंदे कन्नै मिलियै ओह परस्पर सहयोग गी नमीं उड़ान देने भारत-जापान आर्थिक ते निवेश सरबंधें दे दायरे ते महत्वकांक्षाएं दा विस्तार करने ते AI ते सैमीकंडक्टर समेत नमीं काहडे च सहयोग गी अगगै बदाने दी कोशिश करगंन।

<><><><><><>

High Commissioner Canada

दिनेश के. पटनायक कनाडा च भारत दे नमें उच्चायुक्त होगंन। 1990 बैच दे भारतीय विदेश सेवा दे अधिकारी श्री पटनायक इस बेल्लै स्पेन च भारत दे राजदूत ना। विदेश मंत्रालय नै दस्सेया जे श्री पटनायक तौले गै कनाडा च कार्यभार साम्भी लैगंन। कनाडा नै बी अनुभवी राजनयिक क्रिस्टोफर कूटर होरें गी भारत च अपना उच्चायुक्त बनाया ऐ। श्री कूटर होरें गी कूटनीति दा लम्मा तर्जुबा ऐ ते ओह हाल तगर इस्राइल च कनाडा दे राजदूत दे रुपै च कम्म करा करदे ना।

<><><><><><>

Ukraine Attack Reaction

यूरोपीय संघ दे कार्यकारी आयोग दी अध्यक्ष उर्सुला वॉन डेर लेयेन होरें यूक्रेन दी राजधानी कीव पर रूस दे जानलेवा हमले पर रोह-रोसा जताया ऐ। इस हमले च कीव च यूरोपी संघ दे प्रतिनिधिमंडल दफतरै गी बी नुकसान पुज्जा ऐ। आयोग दिएं अध्यक्ष होरें सख्त लफ्जें च आखेआ ऐ जे रूस दा मिसाइल हमला राजनयिक मिशन दे बड़ा नेडेआ होआ। हमले च 5 मंजिला रिहायशी इमारत तबाह होई गई ते नेडे दे यूरोपी संघ मिशन ते ब्रिटिश परिषद गी नुकसान पुज्जा। यूरोपी संघ दिएं प्रवक्ता होरें आखेआ ऐ जे कुसै बी राजनयिक मिशन गी कदें बी निशाना नेई बनाया जाना लोडचदा ऐ ते ब्रसेल्स च रूस दे प्रभारी राजदूत गी सदेया जा' रदा ऐ। रूस ते यूक्रेन बशकार जंग रोकने दे अमरीकी कूटनीतिक जतनें परैन्त रूस नै एह हमले कीते ना। ब्रिटेन दे प्रधानमंत्री सर कीर स्टारमर होरें रूस दे राष्ट्रपति व्लादिमीर पुतिन पर शांति दी मेदें गी नुकसान पुजाने दा आरोप लाया, जदके यूरोपी संघ दी बदेश नीति दे प्रमुख काजा कल्लास होरें आखेआ ऐ जे रूस नै शांति सरबन्धी जतनें गी नाकाम करने दा विकल्प जानी-बूझियै चुनेआ ऐ। यूक्रेन दे राष्ट्रपति वोलोदिमिर ज़ेलेन्स्की होरें आखेआ ऐ जे रूस नै गल्लबात दे बजाय मिसाइल हमले गी चुनेआ ऐ। उ'नें रूस पर नमीं ते होर सख्त बंदिशें दी लोड दोहराई ऐ। यूक्रेन च अमरीका दे बशेश दूत कीथ केलांग होरें आखेआ जे रिहायशी इलाकें पर रूस दे मारू हमलें शांति लेई खतरा पैदा करी दिता ऐ जेह्दी कोशश राष्ट्रपति डोनाल्ड ट्रम्प होर करै करदे हे। जर्मन चांसलर फ्रेडरिक मर्ज़ होरें आखेआ ऐ जे रूस नै इक बारी फ्ही अपना असली चेहरा दस्सी दिता ऐ ते यूरोपी संघ दे प्रतिनिधिमंडल दफतरै पर हमला रूस दी बधदी बशर्मी दी सारत ऐ।

<><><><><><>

Mobile Connectivity

संचार मंत्री ज्योतिरादित्य सिंधिया होरें जम्मू-कश्मीर, हिमाचल-प्रदेश ते उत्तराखंड दे हाड प्रभावित क्षेत्रें च Mobile Connectivity ब्हाल करने दे मद्देनजर इक उच्च स्तरीय समीक्षा

बैठक लाई। संचार मंत्रालय दे वरिष्ठ अधिकारियों, दूर संचार सचिव डाक्टर Neeraj Mittal BSNL ते होर दुए दूर संचार ऑपरेटरें दे अधिकारियों दी मीटिंग च हिस्सा लैता। सिंधिया होरें सब्भनें प्रभावत क्षेत्रें ते चेचा करी जम्मू दे डोडा ते उधमपुर क्षेत्र जेडे सब्भनें शा प्रभावत इलाके न, उत्थे सेवार्यें गी ब्हाल करनेलेई फौरी तौरा उप्पर कारवाई करने दे निर्देश जारी कीते। अंतर जिला ते घाटी Connectivity च प्रतिबंधें उप्पर नेडमी तक्क रक्खी जा रदी ऐ तां जे सेवार्यें गी तौले शा तौले पैहले आहला लेखा सामान्य बनाया जाई सकै।

<><><><><><>

National Sports Day

देश भरै च अज्ज राष्ट्री खेल दिवस मनाया जा रदा ऐ। एह ध्याडा हर बरे 29 अगस्त गी हॉकी दे दिग्गज खडारी मेजर ध्यानचंद हुंदी जयंति पर मनाया जन्दा ऐ। इस बरे राष्ट्री खेल दिवस दा विशे ऐ- “शांतिपूर्ण ते समावेशी समाज को प्रोत्साहन देने के लिए खेल”। एह विषे इस गल्ल पर जोर दिंदा जे खेडुं रुकावटें गी हटाई सकदियां न- टीम वर्क गी बढावा देई सकदे न ते क्षेत्र धर्म जां पृष्ठभूमि दे मतभेदें शा परे लोकें गी किट्टे आनी सकदियां ना। इस आयोजन दे कन्नो-कन्नो “फिट इंडिया मिशन” 29 शा 31 अगस्त तगर त्रै-रोजा राष्ट्रव्यापी कार्यक्रम आयोजित करोग। “एक घंटा खेल के मैदान में” जनेह अभियान लोकें गी हर रोज घट्ट कोला घट्ट आउटडोर खेडुं ते शारीरिक गतिविधियें आस्तै समर्पित करने आस्तै प्रोत्साहित करगंन।

<><><><><><>

Asia Hockey Cup

12मीं एशिया कप हॉकी प्रतियोगिता अज्जै थमां बिहार दे राजगीर च राष्ट्री खेड्डु दिवस दे मौके उप्पर शुरू होआ करदी ऐ। भारती हॉकी दे सब्भनें शा म्हान खड्डारिणं चा इक्क मेजर ध्यानचंद हुदे जरम ध्याडे दे मौके उप्पर देशै च राष्ट्री खेड्डु दिवस मनाया जंदा ऐ। बिहार दे मुखमंत्री नितीश कुमार अज्ज दपैहरी प्रतियोगिता दा उद्घाटन करडन। प्रतियोगिता च भारत दे अलावा जापान, चीन, कजाखस्तान, मलेशिया, दक्खन कोरिया, बांग्लादेश ते चीनी ताइपे हिस्सा लै करदे ना। एशिया कप अगले बरै होने आहले हॉकी विश्व कप लेई क्वालीफायर प्रतियोगिता बी ऐ। प्रतियोगिता च कुल 24 मैच खेड्डे जाडन। फाइनल 7 सितंबर गी होग। भारती टीम दे कप्तान हरमनप्रीत सिंह होरें टीम दे विश्वकप लेई क्वालीफाई करने दी मेद जाहर कीती ऐ। उनें आक्खेआ जे टीम एकता ते जित्त दी रणनीति दे कन्नै मैदान च उतरोग ते मैच दे दरान मिले दे मौकें गी गोल च बदलने दे सब्भै जतन बी करोग। पूल-ए च भारत दे कन्नै जपान, चीन ते कजाखस्तान गी रक्खेआ गेदा ऐ। भारत अज्ज अपना पैहला मैच चीन दे कन्नै खेड्डोग। ऐतवारें भारत दा सामना जपान कन्नै होग जदके संगारें भारत अपने अखीरले पूल मैच च कजाखस्तान कन्नै खेड्डोग। पूल-बी च मलेशिया, कोरिया, बांग्लादेश ते चीनी ताइपे ना। मजूदा चैम्पियन दक्खन कोरिया नै सब्भनें शा मती यानि 5 बारी एशिया कप दा खिताब जित्ते दा ऐ जदके मेजवान भारत नै 3 बारी एहू खिताब अपने नांऽ कीते दा ऐ। प्रतियोगिता च दर्शक मुफ्त खेड्डु दिक्खी सकडन।

<><><><><><>

Weightlifting

अहमदाबाद च भार तुल्लकने आहली राष्ट्रमंडल चैम्पियनशिप च भारत दे भार तुल्लकने आहले खड्डारिणं दा शानदार प्रदर्शन जारी ऐ। मर्दे दे 79 किलोग्राम भार वर्ग च, अजय बाबू वल्लूरी होरें 335 किलोग्राम भार चुक्कियै सुन्ने दा तगमा जित्तेआ। अजय बाबू होरें मलेशिया

दे मुहम्मद एरी ते नाइजीरिया दे अदेदापो अदेलेके गी पछाडदे होई अगले ब'रे ग्लासगो राष्ट्रमंडल खेड्डें लेई बी क्वालीफाई करी लैता। महिलाएं दे 69 किलोग्राम भार वर्ग दे फाइनल च हरजिंदर कौर होरें 222 किलो वजन चुक्कियै केंहू दा तगमा जित्तेआ। भार तुल्लकने आहली 30मीं राष्ट्रमंडल चैंपियनशिप च 31 मुल्लखें दे 300 शा मते खड्दारी हिस्सा लै करदे ना। एह्दे शा पैहले इस हफ्ते दे शुरु च तोक्यो ओलिम्पिक च चांदी दा तगमा जित्तेने आहली मीराबाई चानू होरें महिलाएं दे 48 किलोग्राम भार वर्ग च सुन्ने दा तगमा जित्तिथै भारती अभियान दी शुरुआत कीती ही ते औने आहली राष्ट्रमंडल खेड्डें च अपनी थाहर पक्की करी लैती ही।

<><><><><><><><>

IMD Weather

अरुणाचल प्रदेश- समुन्द्री कंडे आहले कर्नाटक- मध्य महाराष्ट्र ते उत्तराखंड च अज्ज बड़ी मती तेज बरखा होने दी शेंका ऐ। मौसम विभाग नै गुजरात.-कर्नाटक-केरल-माहे-कोंकण-गोवा- मध्य प्रदेश- पश्चिम बंगाल- सिक्किम- तेलंगाना- ते विदर्भ च बी मौलाधार बरखा दी पेशगोई कीती ऐ। पूर्वोत्तर भारत च बी इयै नेंही स्थिती रौहने दी संभावना ऐ। पूर्वी राजस्थान- हरियाणा-चंडीगढ़- हिमाचल प्रदेश ते पंजाब च बी तेज बरखा दा अनुमान ऐ। अंडमान- निकोबार टापुएं-बिहार- जम्मू-कश्मीर- लद्दाख-गिलगित- बाल्टिस्तान- मुज्जफराबाद- झारखंड ते तेलंगाना च अंधी-चक्खड ते गरज-चमक कन्नै बरखा होने दी संभावना ऐ।

<><><><><><><><>

